



Peter Olsen
Inatsisartunut ilaasortaq, Inuit Ataqtigii

§ 37 naapertorlugu apequttip nr 2020/163-ip akineqarnera – nipilersortartut tapiiffigineqartarnerannut tunngasoq

01-10-2020
Suliap normua. 2020 - 16758
All. nr. 14926643

Postbos 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Peter Olsen,

Inatsisartut suleriaasiat naapertorlugu apequtinnut qujanaq. Apequtigineqartut tullinnguuttuni akissuteqarfigissavakka.

Apeqqut 1: 2017-miit 2019-ip tungaanut saqqummersitsiviit qassit qinnuteqarnikuuppat?

a. Aamma ataasiakkaarlutik qanoq tapiiffigineqarsimappat?

Akissut:

2017-imi saqqummersitsiviit tallimat, 2018-imi sisamat 2019-ilu tallimat aningaasaliissutinut qinnuteqarsimapput.

2017-imi saqqummersitsiviit katillugit marluk tapiiffigineqarsimapput, taakkunangalu ataaseq qinnuteqaatinut 19-inut agguataarlugit 507.308 kr.-nik aappaalu qinnuteqaatinut marlunnut agguataarlugit katillugit 17.120 kr.-nik tunineqarput.

2018-imi saqqummersitsiviit katillugit marluk tapiiffigineqarsimapput, taakkunangalu ataaseq qinnuteqaatinut 19-inut agguataarlugit 523.033 kr.-nik aappaalu qinnuteqaammut ataatsimut katillugit 42.668 kr.-nik tunineqarput.

2019-imi saqqummersitsiviit katillugit pingasut tapiiffigineqarsimapput, taakkunangalu ataaseq qinnuteqaatinut 14-inut agguataarlugit 345.115 kr.-nik, aappaa qinnuteqaammut ataatsimut katillugit 6.969 kr.-nik, pingajuallu qinnuteqaammut ataatsimut katillugit 2.589 kr.-inik tunineqarput.

Apeqqut 2: 2017-miit 2019-ip tungaanut inuinnaat taalliortut erinniortullu ataasiakkaat qassit qinnuteqarnikuuppat?

a. Aamma ataasiakkaarlutik qanoq tapiiffigineqarsimappat?

Akissut: Ukiuni pingasuusuni taakkunani qinnuteqartut tallimaasimapput inuttut ataasiakkaat (ingerlatseqatigiiffiunngitsut) qinnuteqartut, taakkunangalu arlaannaalluunniit aningaasaliissutinik tapiiffigineqarsimangilaq.

Apequt 3: Inuit ataasiakkaat, taallortut erinniortullu immiussinissaminnut atatillugu tapiissutissanik tassunga konto-mut pineqartumut qinnuteqarsinnaappat?

a. Naamiuppat tamanna sumik peqquteqarpa?

b. Naamiuppat, taallortut erinniortullu immiussinissaminnut tapiissutissanik konto-mut tassunga pineqartumut qinnuteqarsinnaalernissaat Naalackersuisunit pilersaarutigineqarpa?

c. Aappiuppat, taava ataasiakkaat qanoq annertutigisumik tapiiffigineqarsinnaatitaappat?

Akissut: Tunngaviatigut aningaasaliissutaasunut tapiiffigineqarnissamik kikkulluunniit qinnuteqarsinnaapput. Ileqquuvorli nuusiorititsisarfiit saqqummersitsinerup kingorna qaammatit pingasut qaangiunnerisigut nipilersuusiornermut aningaasartuutit matunissaannut tapiissutinik tunineqartarnerat, matumani nipilersuusiat nutaat immikkut pingaartillugit.

Tamatuma saniatigut Kalaallit Nunaanni nuusiorititsisut NCB-mut akitsuutinut (Nordisk Copyright Bureau) aningaasartuutaasa matussusernissaannut tapiissuteqartoqartarpoq ingerlatseqatigiiffiup CD-nik DVD-nillu tunisassiorsimanageranut uppersaatai aningaasartuutaalu tunngavigalugit. Tapiissutit utertitsineq aqqutigalugu tunniunneqartarput, kalaallilu nipilersuusiorarnerisa qulakkeernissaannut pingaaruteqartut isigineqarlutik, tassami tapiissutit tamatigoortunik nipilersuusiorarnerissamat qulakkeerineqataapput peqatigitillugulu NCB-mut akiliuteqartarnikkut piginnittussaataaernerumut pisinnaatitaaffillit tapersersuiffigineqarmata.

Tapiiffigineqarnissamat periarfissat siuliani taaneqartut saniatigut inuussutissarsuutigalugu eqqumiitsuliornermik ingerlataqartut pilersitsisartullu Kalaallit Nunaanni aalajangersimasumik najugallit, taakkunungalu ilaallutik taallortartut nipilersuusiorartullu, assersuutigalugu taallanik, nipilersuutinik nipilersuusianillu ineriartortitsinissaminnut, qinnuteqareernerikkut legatinik tunineqarsinnaapput.

Apequt 1-imi piffissap taaneqartup iluani inuit ataasiakkaat immiussinissaannut, taallortunut nipilersuusiorartunullu toqqaannartumik tapiissuteqartoqarsimanngilaq. Tapiissutit nuusiorititsisarfiit aqqutigalugit tunniunneqarsimapput.

Inussiarnersumik inuulluaqqusillunga


Karl Frederik Danielsen